

il canzelier grando domino Francesco Fasuol dotor, una exortation da parte dil Serenissimo Principe, Illustrissima Signoria e tutto il Colegio, a cadaun andar a pagar le angarie e dove i sono debitori di la Signoria nostra, per aiutar la Republica e aiutarsi sè medesimi, vedendo la Divina Gratia prosperar a la recuperation dil stado nostro, come si vede principiari, con altre parole ben ornate et dite, laudate da ogniuno. Noto. La meza tansa fin qui à scosso *solum* ducati

Di campo, dil provedador Capello, date a dì 11, hore 24. Come fevano il ponte e la matina pasariano Adda, et non haveano voluto principiari a passar quella sera, perchè a passar sguizari dura 4 hore li loro cariazi. Si dice francesi esser levati di Pizigaton e iti verso Pavia e Alexandria di la Paia. *Item*, aver aviso di Milan che erano soto sopra. Missier Zuan Giacomo Triulzi, era li in Milan, diceva voler morir li, et che il reverendissimo cardinal havia mandà verso Milan il generale di Humiliati di Landriano foraussito con 25 cavalli de' sguizari, per veder che Milan si rendi per non aver il sacho. *Item*, il cardinal e sguizari dicono voler seguir francesi fino in Aste, e il cardinal vol Aste. *Item*, scrive in zifra zercha il brieve che li fo mandato per il Senato per aver la restituzion di le terre.

177* *Di Bergamo, di la comunità fo una letera drizata a la Signoria nostra.* Come erano ritornati soto la pristina servitù e ringratiava Idio alegrandosi, et con desiderio aspectavano il suo provedador sier Domenego Contarini electo che 'l vadi; con altre parole in dita letera; la copia sarà qui avanti. È da saper, li si ritrova sier Carlo Miani qu. sier Anzolo, el qual andoe con li bergamaschi, e per li monti di Sallò è capitato de li, et scrive a li soi di le feste e fuogi hanno fato bergamaschi; la Capella si teniva ancora per francesi.

In questa sera fu fata una solenne cena a caxa dil conte di Chariati orator yspano. Vi fu 10 a tavola: el signor Alberto da Carpi orator cesareo, monsignor de Ru, domino Andrea Letistener e domino Gasparo Vincer, sier Lunardo Moeenigo savio dil Consejo, sier Zuan Badoer dotor e cavalier va orator in Spagna, sier Nicolò Bernardo e sier Alvisè Pixani *etiam* savii da terra ferma, Gasparo di la Vedoa secretario et lui orator. Fece una cena excellentissima con molte fercule etc.

A dì 14, la matina. Vene in Colegio sier Domenego Contarini *alias* electo provedador a Bergamo, e richiesto di andar a Bergamo, rispose esser preparato, ma se li dia cavalli; e cussi anderà.

Vene il signor Alberto da Carpi orator cesareo. Disse voleva andar a Roma per letere aute dal Curzense, e partirà con la galia Capella, et va per stafeta; con la qual galia *etiam* vi va sier Zuan Badoer, va orator in Spagna; smonterano a Rimano over Pexaro. E la galia è zà expedita a Santo Antonio e verso Lio, fato la cercha e tutto; soracomito sier Hironimo Capello qu. sier Andrea. Aricordò dito signor Alberto, qual fa optimo officio per la Signoria nostra, che si mandi uno orator contra il Curzense a Trento etc., et si oferse far bon officio a Roma. Nota. Dito orator è domino Zuan Colla. Hanno auto da la Signoria di ducati . . . milia fin qui, e Zuan Colla parti per

È da saper, dito signor Alberto à auto una patente di l'Imperador di reintegration dil stato suo di Carpi tolliti per francesi, e cussi di quello teniva il ducha di Ferrara; el qual Ducha li pagi le intrade scosse e tutti li danni patidi, *ut in ea*.

Vene l'orator yspano e li fo comunicato le nove di campo, e dil prosperar sguizari.

Fu terminato donar al dito signor Alberto ducati 200, et fo balotati in Colegio e preso; qual si dovea far con il Pregadi.

Fo terminato, per il Colegio, per relatione di savii ai ordeni, che li panni fono tolliti a quelli merchadanti per la galia Truna a Rimano, che sono a Chioza, fusseno restituiti, e cussi fo scritto al podestà di Chioza dovesse darli de chi i erano.

Di campo, vene in questa matina letere dil provedador Capello, date a dì 12, hore 10 a . . . 178

. Come era fato il ponte sora Ada li a et principiato a passar, e nel passar di le artellarie, il ponte vene a rompersi, *adeo* si ha convenuto riconzar; e cussi tutto il campo è in ordine per passar. E per stratioti, andati di là, si ha i nimici esser levati di Pizigaton et andati per passar Po et andar via; el qual locho di Pizigaton nostri à tolto, zoè el cardinal, e postovi dentro sguizari a nome di la Liga. *Item*, il cardinal à mandato verso Milan il general di Humiliati con 25 cavali di sguizari e foraussiti; si tien sia intrato. *Item* hanno, Lodi, Piasenza e Parma aversi dato a la Liga, e tutto Milan è in arme. *Item*, scrive dito provedador, aver mandato sier Andrea Zivran, zonto in quella hora, li in campo con 150 cavali e alcuni fanti, e quel da Santo Anzolo condutier nostro a veder di aver Crema e quella tenirla a nome di la Signoria nostra. Altre particolarità scrive; ma questo è il sumario, e aver mandato scorta contra li danari etc.

Di Mantova, di l'Agustini fo letere a la Si-